

Bil. 43

Rabu

2 Disember 2020



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KETIGA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Perigi Tujuh Serendah Warisan Hulu Selangor**
- YB. Puan June Leow Hsiad Hui
(Hulu Selangor) (Halaman 1)
- **Memastikan Proses Pilihan Raya yang Selamat
untuk Semua Dalam Wabak COVID-19**
- YB. Puan Vivian Wong Shir Yee (Sandakan) (Halaman 4)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA
Rabu, 2 Disember 2020**

Mesyuarat dimulakan pada pukul 12.00 tengah hari

DOA

*[Timbalan Yang di-Pertua (Dato' Sri Azalina Othman Said)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Perigi Tujuh Serendah Warisan Hulu Selangor

12.04 tgh.

Puan June Leow Hsiad Hui [Hulu Selangor]: Terima kasih. Terima kasih Tuan Yang di-Pertua, terima kasih Yang Berhormat Menteri. Tuan Yang di-Pertua, Perigi Tujuh Serendah yang terletak di Hulu Selangor merupakan sebuah kunci air yang telah wujud lebih daripada 100 tahun yang lalu. Ia khazanah tertua tinggalan zaman pentadbiran Inggeris yang masih berdiri teguh di Serendah. Kini ia merupakan kawasan rekreasi yang berlandskap bersih dan menghidu, menjadi lokasi wajib singgah di Serendah.

Bukan sekadar tempat beriadah dan berehat, ia juga menjadi tempat pelancongan daerah ini. Perigi Tujuh berkait rapat dengan nama dan sejarah pekan Serendah. Pada zaman dahulu, ia dibina untuk mengurangkan risiko banjir yang kerap berlaku di kawasan penempatan kerana bentuk muka bumi yang rendah dan dikelilingi bukit.

Tuan Yang di-Pertua, sebelum pembinaan Perigi Tujuh, banjir kerap berlaku di kawasan kampung sekitar sehingga menyukarkan aktiviti perlombongan. Justeru, pegawai Inggeris mengesyorkan pembinaannya. Ia dibina dengan tujuh saluran air bawah tanah yang berakhir dengan kolam takungan sebelum limpahannya mengalir keluar ke sungai.

Sebelum dikenali sebagai Perigi Tujuh, binaan ini terlebih dahulu dikenali sebagai Pintu Tujuh. Ia berubah selepas laluan utama air ke bawah tanah pecah akibat dilanggar kapal korek sehingga menyebabkan pekan Serendah dilanda banjir besar suatu ketika dahulu. Ekoran kerosakan pada saluran air utama, aliran sungai kemudiannya disalurkan menerusi tujuh laluan

yang berbentuk seperti perigi. Sejak itu, Pintu Tujuh ini dikenali sebagai Perigi Tujuh Serendah.

Tuan Yang di-Pertua, Parlimen Hulu Selangor pernah menganjurkan program besar-besaran di lokasi ini seperti Program Serendah Eco Run yang berlangsung pada 17 November 2019 dan Program I Love Serendah pada 9 Ogos 2020 bagi mempromosikan daya tarikan Perigi Tujuh Serendah.

Kedua-dua program ini turut dihadiri oleh Pengarah Kanan Domestik dan Acara Tourism Malaysia iaitu Yang Berbahagia Dato. Dr. Ammar bin Abdul Ghapar. Hulu Selangor melihat kawasan ini berpotensi untuk diangkat sebagai antara warisan buat negara kita. Ia bukan sahaja menampilkan satu reka bentuk yang unik malah mempunyai sejarahnya yang tersendiri di samping turut dijadikan tempat beriadah.

Hulu Selangor juga mencadangkan agar pihak kementerian dapat membantu dalam mengindahkan lagi kawasan tarikan pelancongan ini. Untuk makluman, Jabatan Pengairan dan Saliran Daerah Hulu Selangor merupakan agensi yang bertanggungjawab untuk menjaga warisan ini serta membantu menyelenggarakan kawasan tersebut. Namun agensi ini tidak mempunyai peruntukan yang cukup untuk menyediakan fasiliti bagi kemudahan para pelancong.

Tuan Yang di-Pertua, justeru itu, diharapkan pihak kementerian dapat bekerjasama dengan agensi setempat dalam membantu melengkapkan kemudahan awam dan menambah lagi infrastruktur di kawasan pelancongan tersebut. Dengan kerjasama pelbagai pihak, Hulu Selangor percaya bahawa Perigi Tujuh Serendah akan menjadi suatu tarikan ikonik yang akan merancakkan sektor pelancongan. Sekian, terima kasih Tuan Yang di-Pertua.

Timbalan Yang di-Pertua [Dato' Sri Azalina Othman Said]: Silakan.

12.07 tgh.

Menteri Pelancongan, Seni dan Budaya [Dato' Sri Hajah Nancy Shukri]: Terima kasih Tuan Yang di-Pertua, terima kasih Yang Berhormat Hulu Selangor. Tuan Yang di-Pertua, seperti yang dinyatakan oleh Yang Berhormat Hulu Selangor sebentar tadi, Perigi Tujuh Serendah ini bukan sahaja unik rupanya dan mempunyai objektifnya tersendiri iaitu untuk mencegah banjir yang besar di kawasan berkenaan malah reka bentuk empangan kecil di kawasan itu juga menarik minat pelawat yang hadir kerana seni binanya yang menyerlahkan ciri-ciri seni bina yang lama.

Kementerian Pelancongan, Seni dan Budaya (MOTAC) sentiasa bekerjasama dengan pihak kerajaan negeri dan pihak berkuasa tempatan

dalam membangun, memelihara dan mempromosikan tempat-tempat yang berpotensi dijadikan produk pelancongan di seluruh negara. Justeru, MOTAC akan bekerjasama dengan pihak berkuasa tempatan di kawasan Hulu Selangor bagi memastikan tempat-tempat menarik di kawasan ini yang boleh diketengahkan sebagai produk pelancongan negara.

Khusus berkenaan Perigi Tujuh Serendah ini, ia adalah di bawah seliaan Jabatan Pengairan Saliran Daerah Hulu Selangor yang pada masa ini bertanggungjawab antaranya dalam melaksanakan kerja-kerja penyelenggaraan di persekitaran perigi tujuh tersebut. Namun pada masa yang sama, kementerian melalui Pejabat MOTAC negeri Selangor daripada semasa ke semasa sentiasa berbincang bagi tujuan penambahbaikan yang boleh dilakukan di kawasan ini.

Dalam hal ini Tuan Yang di-Pertua,, saya telah difahamkan bahawa pihak Majlis Daerah Hulu Selangor mempunyai perancangan untuk menyelenggara dan membaik pulih produk-produk pelancongan di Daerah Hulu Selangor yang meliputi antaranya Perigi Tujuh Serendah ini serta beberapa produk pelancongan di Kuala Kubu Bharu. Permohonan cadangan projek ini akan dibawa dan dibincang bersama dengan Kerajaan Negeri Selangor serta agensi-agensi berkaitan untuk dipertimbangkan.

Secara dasarnya Tuan Yang di-Pertua, sebarang permohonan bagi membangun dan menaiktaraf tempat pelancongan di mana-mana tempat di seluruh negara yang benar-benar berpotensi dan memberi faedah kepada masyarakat tempatan dan ekonomi negara akan diberi perhatian dan diambil tindakan sewajarnya oleh kementerian ini. *Insyaa-Allah*, saya akan pergi melawat untuk melihat sendiri Perigi Tujuh Serendah ini dalam masa yang terdekat bagi meninjau keadaan kemudahan pelancongan di tempat ini.

Sebenarnya hasrat lawatan ini telah kita rancang setelah perkara berhubung Perigi Tujuh ini dibangkitkan oleh Yang Berhormat Hulu Selangor pada sesi Mesyuarat Dewan Rakyat yang lalu. Namun ia terpaksa ditunda ekoran pelbagai faktor termasuklah pelaksanaan Perintah Kawalan Pergerakan Bersyarat (PKPB) baru-baru ini.

■1210

Saya berharap agar penundaan ini tidak memakan masa yang lebih lama. Dalam pada masa yang sama, MOTAC akan meneruskan kerjasama dengan penggiat industri tempatan bagi terus mempromosikan tempat-tempat pelancongan di Hulu Selangor khususnya dan negeri Selangor secara amnya. Antaranya adalah melalui penganjuran lawatan suai kenal wakil media dan penggiat industri pelancongan.

Program seperti '*Mega Familiarization*' (MEGA FAM) membawa pengusaha pelancongan, penerbit rancangan televisyen, wartawan dan '*blogger*' antarabangsa untuk bekerjasama dalam menjual pakej-pakej pelancongan menarik dan membuat liputan ke atas acara-acara yang dijalankan.

Usaha-usaha penganjuran program-program sukan, kesenian dan kebudayaan juga akan terus disokong dan dibantu oleh MOTAC melalui agensi-agensi seperti Tourism Malaysia. Sementara itu, MOTAC melalui Jabatan Warisan Negara (JWN) bertanggungjawab melindungi khazanah warisan negara termasuk di Negeri Selangor melalui pewartaan di bawah Akta Warisan Kebangsaan 2005 [Akta 645].

Setakat ini, terdapat 3 tapak warisan yang telah diwartakan di daerah Hulu Selangor di bawah Akta 645. Manakala sejumlah 11 butiran tapak warisan di Hulu Selangor telah disenaraikan ke dalam Senarai Inventori JWN bagi tujuan penyelidikan dan kajian lanjut sebelum diwartakan.

Dalam hal ini, sukacita dimaklumkan bahawa Perigi Tujuh Serendah adalah salah satu daripada 11 butiran yang berada dalam Senarai Inventori tersebut. Selanjutnya, sekiranya memenuhi salah satu daripada sembilan kriteria yang dinyatakan dalam seksyen 67(2), Akta 645, tapak ini boleh dicadangkan untuk diangkat statusnya menjadi warisan atau warisan kebangsaan.

Pewartaan ini boleh memberi nilai tambah kepada tarikan sektor pelancongan selain untuk memulihara, memelihara dan melindungi khazanah warisan tersebut. Akhir kata, saya dan kementerian ini amat mengalu-alukan pandangan dan peluang kerjasama dalam usaha-usaha menyemarakkan sektor pelancongan dan kebudayaan negara. *Insyaa-Allah* kalau saya pergi, saya akan maklumkan kepada Yang Berhormat Hulu Selangor ya. Sekian, terima kasih.

Timbalan Yang di-Pertua [Dato' Sri Azalina Othman Said]: Terima kasih Yang Berhormat Menteri. Jawapan yang cukup panjang. Terbaik.

Memastikan Proses Pilihan Raya yang Selamat untuk Semua Dalam Wabak COVID-19

12.13 tgh.

Puan Vivian Wong Shir Yee [Sandakan]: Terima kasih Tuan Yang di-Pertua dan Yang Berhormat Timbalan Menteri. Tuan Yang di-Pertua, ramai yang berpendapat bahawa pilihan raya negeri Sabah yang diadakan pada

bulan September yang lalu merupakan penyumbang utama gelombang ketiga kes COVID-19 yang sedang kita alami pada masa ini.

Kes COVID-19 positif harian di Sabah telah meningkat berlipat kali ganda daripada hanya dua hingga tiga kes pada hujung bulan Ogos kepada angka tiga digit hampir setiap hari untuk tempoh masa sebulan. Dalam tempoh masa kurang daripada dua bulan, jumlah kes aktif di Sabah telah melonjak daripada hanya 18 kes pada 5 September 2020 kepada 7,433 kes pada 27 Oktober 2020, genap sebulan selepas PRN Sabah diadakan.

Tuan Yang di-Pertua, berdasarkan angka-angka tersebut sahaja, seolah-olah kelihatan PRN Sabah merupakan penyumbang utama kepada peningkatan jumlah kes positif COVID-19. Namun begitu, adakah benar pilihan raya merupakan faktor tunggal yang membawa kepada pertambahan mendadak kes COVID-19?

Banyak kota besar dan negara lain yang telah mengadakan pilihan raya tahun ini, tatkala berlakunya wabak COVID-19 tetapi nampaknya menunjukkan situasi yang berlainan daripada apa yang kita alami. Berikut merupakan beberapa contoh:

- (i) PRK DUN Slim pada Ogos 2020;
- (ii) PRK DUN Chini pada Julai 2020;
- (iii) PRU Singapura pada Julai 2020;
- (iv) PRU Korea Selatan pada April 2020; dan;
- (v) PRU New Zealand pada Oktober 2020.

Kesemua pilihan raya yang disebutkan di atas tidak dilihat sebagai punca berlakunya sebarang cetusan kes baharu COVID-19 di negara dan bandar masing-masing. Oleh itu, saya ingin bertanya kepada pihak kerajaan, apakah kesilapan sebenarnya yang berlaku semasa PRN Sabah? Adakah Suruhanjaya Pilihan raya telah membuat kajian dan penilaian semula keseluruhan proses PRN Sabah dan mengenal pasti masalah sebenar yang menyumbang kepada terjadinya gelombang ketiga kes COVID-19 kini.

Apakah cadangan dan tindakan susulan yang akan diimplementasikan oleh kerajaan untuk memastikan PRK Batu Sapi yang akan datang atau mana-mana pilihan raya di negara kita kelak tidak akan mengulangi kesilapan yang sama dan akan diadakan dengan cara yang tidak akan membahayakan keselamatan dan kesihatan rakyat jelata?

Tuan Yang di-Pertua, kerajaan mestilah mengolah strategi dan prosedur operasi standard (SOP) baharu yang lebih berkesan untuk memastikan bukan sahaja kesihatan dan keselamatan malahan juga hak

demokratik segenap lapisan masyarakat akan terpelihara tatkala kita membiasakan diri dengan kehidupan norma baharu kini. Sekian, terima kasih.

Timbalan Yang di-Pertua [Dato' Sri Azalina Othman Said]: Silakan Yang Berhormat Timbalan Menteri.

12.16 tgh.

Timbalan Menteri di Jabatan Perdana Menteri (Parlimen dan Undang-undang) [Datuk Haji Shabudin Yahaya]: *Assalammualaikum warahmatullahi wabarakatuh.* Terima kasih kepada Tuan Yang di-Pertua dan terima kasih kepada Yang Berhormat Sandakan yang telah pun mengemukakan pertanyaan dan juga pandangan-pandangan tentang isu COVID-19 dan juta pilihan raya di Sabah.

Tuan Yang di-Pertua, kerajaan khususnya Jabatan Perdana Menteri amat menghargai dan mengucapkan terima kasih atas keprihatinan Yang Berhormat Sandakan yang telah mengemukakan Ucapan di bawah Usul Berkenaan Perkara Tadbir Kerajaan (Peraturan Mesyuarat 17) berkaitan isu-isu pilihan raya. Tuan Yang di-Pertua, penjelasan terhadap isu-isu dan persoalan yang dibangkitkan oleh Ahli Yang Berhormat dalam usul tersebut adalah seperti berikut;

Yang pertamanya yang berkaitan dengan apakah kesilapan yang berlaku semasa PRU Sabah? Adakah Suruhanjaya Pilihan Raya telah membuat kajian dan penilaian semula keseluruhan proses PRU Sabah? Sebagaimana Ahli Yang Berhormat sedia maklum, PRU DUN Sabah Ke-16 diadakan berikutan pengisytiharan pembubaran Dewan Undangan Negeri Sabah Ke-15 yang telah diperkenan oleh Tuan Yang Terutama Yang di-Pertua negeri Sabah pada 30 Julai 2020.

Walau bagaimanapun, pembubaran DUN Sabah Ke-15 telah dibuat pada masa negara sedang berhadapan dengan pandemik Covid-19, namun pilihan raya tersebut tidak dapat dielakkan. Bagi memastikan pengendalian perjalanan PRU DUN Sabah Ke-16 berjalan dengan selamat, lancar dan sempurna, SPR sebagai sebuah institusi yang dipertanggungjawabkan yang mengendalikan pilihan raya di negara ini dengan kerjasama Kementerian Kesihatan Malaysia dan Majlis Keselamatan Negara telah merangka dan menyediakan satu SOP yang jelas iaitu Garis Panduan Pencegahan Covid-19 Bagi Pelaksanaan Pilihan Raya, sama ada pilihan raya umum (PRU) atau pilihan raya kecil (PRK).

Ia disesuaikan selaras dengan arahan semasa Perintah Kawalan Pergerakan semasa di bawah Akta 342 yang dikuatkuasakan oleh pihak

kerajaan seperti yang telah dilaksanakan dalam pilihan raya sebelumnya iaitu PRK DUN N.23 Chini dan juga PRK DUN N.58 Slim.

Garis panduan ini mencakupi semua proses pelaksanaan pilihan raya iaitu Taklimat Petugas Pilihan Raya, Hari Penamaan Calon, Proses Cetakan dan Semakan Kertas Undi, Proses Pengeluaran, Penerimaan dan Pengiraan Undi Pos, Hari Semakan Peti Undi, Tempoh Berkempen, Hari Undi Awal dan Undi Biasa serta Penjumlahan Rasmi Undi.

Antara langkah pencegahan Covid-19 untuk pelaksanaan PRU DUN Sabah Ke-16 adalah seperti berikut:

- (i) pembersihan dan sanitasi di semua premis yang dikenal pasti akan digunakan bagi tujuan pelaksanaan pilihan raya di mana ia perlu dilakukan disinfeksi sebelum, semasa dan selepas selesai digunakan berdasarkan garis panduan KKM;
- (ii) kawalan kehadiran di setiap premis yang digunakan bagi tujuan pilihan raya adalah pada jumlah paling minima yang mana tidak menjejaskan proses pilihan raya dan mematuhi penjarakan fizikal sekurang-kurangnya 1 meter. Selain itu, maklumat kehadiran setiap individu seperti nama dan nombor telefon perlu direkodkan sama ada menggunakan *QR code* di aplikasi MySejahtera atau catatan buku secara manual;
- (iii) saringan suhu badan untuk semua individu yang hadir di premis-premis yang digunakan bagi tujuan pilihan raya di mana individu yang mempunyai suhu badan melebihi 37.5°C, batuk, sakit tekak atau susah nafas tidak dibenarkan masuk ke premis dan perlu meninggalkan premis dengan segera;
- (iv) penjarakan fizikal di premis perlu dilaksanakan di mana susun atur meja di setiap premis yang digunakan disusun dengan jarak 2 meter manakala jarak antara individu adalah 1 meter;
- (v) penggunaan *hand sanitizer* oleh setiap individu yang hadir ke premis sebelum, semasa berada dalam saluran dan selepas selesai urusan bagi tujuan pelaksanaan pilihan raya;

- (vi) penggunaan sarung tangan getah adalah diwajibkan bagi semua petugas pilihan raya dan pegawai SPR yang bertugas bagi setiap proses pilihan raya;
- (vii) penggunaan *face mask* adalah wajib bagi semua individu yang hadir di premis-premis yang digunakan bagi tujuan pelaksanaan pilihan raya;
- (viii) pengundi yang bergejala di mana pengundi yang mempunyai suhu badan melebihi 37.5°C, batuk, sakit tekak atau susah bernafas hendaklah diasingkan serta-merta daripada pengundi yang lain dan mengundi di tempat khas iaitu khemah khas yang disediakan untuk memangkah;
- (ix) penganjuran sebarang bentuk ceramah, syarahan dan perhimpunan bagi tujuan kempen oleh mana-mana individu atau parti politik sepanjang tempoh berkempen adalah dengan jumlah kehadiran yang minima dan perlu mematuhi garis panduan yang ketat seperti mengamalkan penjarakan fizikal serta penggunaan *hand sanitizer* dan *face mask*. Calon atau parti juga digalakkan untuk menggunakan media massa, media sosial dan juga media cetak bagi tujuan berkempen, dan;
- (x) taklimat dan latihan kepada petugas pilihan raya akan dilaksanakan secara atas talian.

Walau bagaimanapun, seperti mana yang dinyatakan oleh Ketua Pengarah Kesihatan pada 2 Oktober 2020, gelombang ketiga Covid-19 ini bukan hanya dihadapi oleh Malaysia malah banyak negara lain di seluruh dunia. Peningkatan kes yang berlaku di Malaysia adalah contoh yang jelas jika SOP tidak dipatuhi. Dalam hal ini, antara pelanggaran terhadap Garis Panduan Pencegahan Covid-19 Bagi Pelaksanaan PRN Sabah ialah:

- (i) tidak memakai pelutup muka ketika berada di pusat mengundi;
- (ii) tidak mematuhi arahan penjarakan fizikal sekurang-kurangnya 1 meter di antara individu; dan
- (iii) tidak merekodkan kehadiran sebelum beredar keluar dari pusat mengundi

Bagi mengatasi masalah tersebut , antara tindakan yang diambil oleh SPR ialah:

- (i) menyediakan pelitup muka di semua pusat mengundi untuk diberikan kepada pengundi yang hadir tanpa pelitup muka;
- (ii) semua petugas pilihan raya di pusat mengundi juga sentiasa memantau kepatuhan pengundi terhadap garis panduan berkenaan terutamanya kepatuhan kepada penjarakan fizikal seperti mengekalkan jarak 1 meter di antara individu; dan
- (iii) merekodkan kehadiran pengundi di pintu keluar pusat mengundi.

Oleh yang demikian, ketidakpatuhan terhadap SOP oleh pihak-pihak yang terlibat di dalam PRU DUN Sabah ke-16 terutamanya yang melibatkan aktiviti berkempen sepanjang tempoh pilihan raya tersebut adalah antara faktor peningkatan kes penularan COVID-19. Ini kerana dalam pelaksanaan dua PRK sebelumnya iaitu di N.23 Chini dan N.58 Slim, tiada sebarang kluster dilaporkan.

Persoalan kedua yang ditimbulkan oleh Yang Berhormat Sandakan ialah apakah cadangan dan tindakan susulan yang akan diimplementasikan oleh kerajaan untuk memastikan PRK Batu Sapi dan PRK lain tidak akan mengulangi kesilapan yang sama.

Sebagaimana Ahli Yang Berhormat sedia maklum, pelaksanaan PRK P.185 Batu Sapi telah dibatalkan setelah Yang di-Pertuan Agong di bawah Perkara 150 Perlembagaan Persekutuan telah mengeluarkan suatu Proklamasi Darurat di Bahagian Pilihan Raya Parlimen P.185 Batu Sapi sebagai langkah proaktif bagi membendung penularan gejala COVID-19 demi keselamatan dan kesejahteraan negara.

Walau bagaimanapun, adalah menjadi tanggungjawab SPR untuk mengadakan PRK P.054 Gerik dan juga PRK N.66 Bugaya. Sekiranya pelaksanaan kedua-dua PRK ini diteruskan, SPR akan mencadangkan dan merangka garis panduan yang lebih ketat dan menyeluruh sebagai langkah meminimumkan risiko penularan dan juga jangkitan virus COVID-19 sepanjang proses pilihan raya tersebut.

Ini termasuklah pindaan kepada garis panduan yang telah diguna pakai semasa PRU DUN Sabah ke-16 yang mana tiada lagi sebarang bentuk kempen secara terbuka seperti ceramah mahupun aktiviti ziarah dari rumah ke rumah

ataupun aktiviti *walkabout*.

Persoalan ketiga yang ditimbulkan oleh Yang Berhormat Sandakan ialah mencadangkan strategi dan prosedur operasi standard (SOP) baharu yang lebih berkesan. Secara umumnya, PRK dilihat agak sukar untuk dilaksanakan ketika pandemik COVID-19 masih memuncak dengan pertambahan kes yang mendadak saban hari.

Namun demikian, SPR sentiasa meneliti dan merangka penambahbaikan Garis Panduan Pencegahan Covid-19 Bagi Pelaksanaan Pilihan Raya yang baharu susulan peningkatan kes COVID-19 dalam negara ketika ini. Garis Panduan ini akan turut mengambil kira tiga syor yang dikemukakan oleh Kementerian Kesihatan iaitu:

- (i) tidak boleh merentas negeri;
- (ii) tiada perhimpunan ramai; dan
- (iii) tiada lawatan dari rumah ke rumah bagi aktiviti berkempen

Di samping itu, SPR akan turut meneliti dan mempertimbangkan pandangan atau cadangan daripada pihak-pihak lain bagi menambah baik pelaksanaan proses pilihan raya di mana isu kesihatan dan keselamatan menjadi keutamaan dalam mendepani wabak pandemik COVID-19 ini. Sekian terima kasih Tuan Yang di-Pertua.

Timbalan Yang di-Pertua [Dato' Sri Azalina Othman Said]: Terima kasih Yang Berhormat Timbalan Menteri. Ahli-ahli Yang Berhormat, dengan itu tamatlah sesi ucapan di bawah Usul Berkenaan Perkara Tadbir Kerajaan mengikut Peraturan Mesyuarat 17 pada hari ini. Ahli-ahli Yang Berhormat, Mesyuarat Kamar Khas ini ditangguhkan sehingga jam 12.00 tengah hari, hari Khamis, 3 Disember 2020.

[Kamar Khas ditangguhkan pada pukul 12.28 tengah hari]